

Mí-iompar sa seomra ranga

Ceist 1

Beidh tú ag féachaint ar ball ar thuairisc faoi mhí-iompar daltaí scoile. Sula bhféachann tú ar an tuairisc an féidir leat féin agus an duine in aice leat na frásaí Gaeilge atá le fáil sa mhír a cheangal leis na frásaí Béarla thíos.

1. to train teachers	a. <i>An Chomhairle um Oideachas Speisialta</i>
2. students who have behavioural problems	b. <i>ag dul i bhfolach faoin mbord</i>
3. National Council for Special Education	c. <i>an tuarascáil atá curtha faoi bhráid</i>
4. going to hide under the table	d. <i>oiliúint a chur ar mhúinteoirí</i>
5. the report which has been submitted to	e. <i>éileamh ar thacú teagaisc</i>
6. the likes	f. <i>a mhacasamhail</i>
7. demand for teaching support	g. <i>daltaí a bhfuil deacrachtaí iompair acu</i>

1	2	3	4	5	6	7

Féachaigí ar an mhír uair amháin le feiceáil an raibh an ceart agaibh.

Ceist 2

Anois féach ar an mhír den dara huair agus ceangal na pointí eolais leis na huimhreacha cuí. Tá an chéad cheann déanta duit.

An t-éileamh a tháinig ar thacú teagaisc le cuidiú le daltaí a bhfuil deacrachtaí iompair acu
Caitheadh an méid seo den bhuiséad iomlán oideachais ar oideachas speisialta in 2011
An méid daltaí ar chuir an Chomhairle cuidiú ar fáil dóibh sa bhliain 2011 agus 2012
Caitheadh an méid seo den bhuiséad iomlán oideachais ar oideachas speisialta in 2011
Caitear an méid seo sa bhliain chun cuidiú le múinteoirí agus scoileanna

1.3 billiún euro / 15% / 23% / 200 milliún euro / 12,000

Ceist 3

Féach ar na focail seo a bhí sa mhír: **an chomhairle** agus **an costas**

- (a) An bhfuil siad firinscneach nó baininscneach?
(b) Féach ar na samplaí seo agus déan plé leis an duine in aice leat ar conas atá tús na bhfocal éagsúil óna chéile.

Focal baininscneach + an t-alt	Focal firinscneach + an t-alt
guta: an aois (gan t-)	guta: an t-urlár (le t-)
s: an tsaoirse (t ar an s)	s: an sos (gan t ar an s)
consan: an bhialann (séimhiú)	consan: an bord (gan séimhiú)

(c) Anois, cuir an t-alt roimh na focail:

seomra, clár dubh, fuinneog, saotharlann, bord, leabharlann*, doras*,
tuairisc*, cóta, aghaidh, airgead

Ceist 4

(a) Cad is brí le ‘caol le caol’ agus ‘leathan le leathan’?

(b) Cad é an dara siolla atá ag na focail choitianta seo:

cail____
dor____
url____
ríomh____
páip____
báb____
bil____
máth____
deirf____
gluaist____

Ceist 5

Pléigh na ceisteanna seo leis an duine in aice leat nó le do ghrúpa:

Cén cineál dalta scoile a bhí ionat féin ar an bhunscoil?
Cén fáth a mbíonn fadhbanna iompair ag páistí óga ar an bhunscoil, dar leat?
Cad a mholfá do mhúinteoir a dhéanamh dá mbeadh fadhb mí-iompair ag dalta sa seomra ranga?

Freagraí

Ceist 1

1	2	3	4	5	6	7
d	g	a	b	c	f	e

Ceist 2

An t-éileamh a tháinig ar thacú teagaisc le cuidiú le daltaí a bhfuil deacrachtaí iompair acu – 23%
Caitheadh an méid seo den bhuiséad iomlán oideachais ar oideachas speisialta i 2011 – €1.3 billiún
An méid daltaí ar chuir an Chomhairle cuidiú ar fáil dóibh sa bhliain 2011 agus 2012 – 12,000
Caitheadh an méid seo den bhuiséad iomlán oideachais ar oideachas speisialta i 2011 – 15%
Caitear an méid seo sa bhliain chun cuidiú le múinteoirí agus scoileanna – €200 milliún

Ceist 3

- (a) an chomhairle – baininscneach, an costas – firinscneach
(b) Déan plé ar na hathruithe ar fad.
(c) an seomra, an clár dubh, an fhuinneog, an tsaotharlann, an bord, an leabharlann*, an doras*, an tuairisc*, an cóta, an aghaidh, an t-airgead

* Tá na “*dentals*” i gceist leis na focail seo. Ní féidir séimhiú a chur ar an ainmfhocal a thosaíonn le d / t / l / s / n tar éis ‘an’.

Ceist 4

(a) Tá gach consán i nGaeilge caol nó leathan. Má thagann guta caol (e/i) roimh chonsán nó tar éis is féidir a rá gur consán caol é. Má thagann guta leathan (a/o/u) roimh chonsán nó tar éis is féidir a rá gur consán leathan é.

Ní hionann an fhuaim a bhíonn ag consán caol agus consán leathan (m.sh. **seas suas**, **teach tábhairne**, **aonach/ éinne**, **madra/ maidin**, **bó/ beo**, srl.) agus mar gheall air seo, ní féidir le consán a bheith leathan ar thaobh amháin agus caol ar an taobh eile. Tá tionchar aige seo ar litriú na Gaeilge, ar ndóigh, mar má bhíonn guta caol roimh chonsán caithfidh guta caol a bheith ina dhiaidh. Mar an gcéanna, má bhíonn guta leathan roimh chonsán caithfidh guta leathan teacht ina dhiaidh. Mar shampla: **bábóg**, **báidín**

*Is eisceacht é na gutaí ‘ae’ atá san fhocal “**Gaeltacht**”. Nuair a thagann siad le chéile, caitear leo mar chonsán leathan.

- (b) cailín
doras
urlár
ríomhaire
páipéar
bábóg
bileog
máthair
deirfiúr
gluaisteán

Ceist 5

Abair leis na foghlaimeoirí na ceisteanna a phlé ina mbeirteanna nó i ngrúpaí.

Eimear Ní Chonaola

Tá sé molta oiliúint a chur ar mhúinteoirí le plé le daltaí a mbíonn deacrachtaí iompair acu i mbunscoileannaⁱ an stáit. I dtuarascáil a foilsíodh inniu, deir an Chomhairle um Oideachas Speisialta gur cheart cúrsa speisialta a chur ar fáil do mhúinteoir amháin i ngach scoil, mar na fadhbannaⁱⁱ is mó a bhaineann le scoileanna (baineann siad le scoileanna) do pháistí le riachtanais speisialta amháin.

Sorcha Ní Mhonacháin

Is é polasaí na Roinne Oideachais anois go rachadh páistí a bhfuil deacrachtaí acu ar an bhunscoil áitiúil is giorra dóibhⁱⁱⁱ seachas chuig scoileanna^{iv} speisialta. Ciallaíonn sin gur beag scoil anois nach gcaithfidh plé le fadhbanna mí-iompair.

Deirbhile Nic Craith, Cumann Múinteoirí Éireann

I gcásanna go mbíonn, sórt, go mbíonn fíorfhadhb ann, tá muid ag caint ar fhadhbanna ar nós troscán a chaitheamh timpeall, leabhair a chaitheamh timpeall, b'fhéidir páistí ag dul i bhfolach faoin mbord agus iompar den chineál sin. Lonsaithe pearsanta ar dhaltaí eile nó fiú amháin ar na múinteoirí agus ar dhaoine fásta eile sna seomraí ranga.

Sorcha Ní Mhonacháin

Tá an costas a bhaineann le fadhbanna mí-iompair i scoileanna an stáit ag méadú. Caitheadh aon ponc a trí billiún euro nó cúig déag faoin gcéad den bhuiséad iomlán oideachais ar oideachas speisialta in 2011. Ó 2009 tháinig méadú fiche a trí faoin gcéad ar an éileamh do thacú teagaisc le cuidiú le daltaí a bhfuil deacrachtaí iompair acu. Caitear dhá chéad milliún euro sa bhliain ar mhúinteoirí agus scoileanna le cuidiú le páistí a bhfuil deacrachtaí acu. Sa scoilbhliain dhá mhíle is a haon déag / dhá mhíle is a dó dhéag, chuir an Chomhairle um Oideachas Speisialta cuidiú ar fáil do dhá mhíle dhéag dalta. Sa tuarascáil seo atá curtha faoi bhráid an Aire Oideachais, Rory Quinn, molann an Chomhairle go gcuirfí oiliúint bhreise ar achan^v mhúinteoir le plé le fadhbanna mí-iompair. Moltar chomh maith go gcuirfí cúrsa oiliúna ar leith ar fáil do mhúinteoir amháin in achan scoil. Molann an chomhairle go gcuirfí dlús le macasamhail an chlár *Na Blianta Dochreidte* agus an clár *Friends* atá in úsáid ar bhonn trialach i gContae Cheatharlach agus Chill Chainnigh. Sorcha Ní Mhonacháin, Nuacht TG4.

ⁱ *bunscoileannaí* a deirtear i gcanúint Chonnachta

ⁱⁱ *fadhbannaí* a deirtear i gcanúint Chonnachta

ⁱⁱⁱ *daofa* a deirtear i gcanúint Uladh

^{iv} *scoltacha* a deirtear i gcanúint Uladh

^v *gach* atá sa chaighdeán